

Inatsisartut Suleriaasianni § 36 naapertorlugu apeqquteqaat aallaavigalugu oqallinnissamik siunnersuut imaattoq matumuuna saqqummiuppara:

Inuit nunat allaneersut pillugit maleruagassat naapertorlugit najugaqarnissamut sulinissamullu akuersissummik pisariaqartitsisut Kalaallit Nunaanni piffissami killilimmi taamaallaat sulisinnaasariaqarnersut, akuersissutit katillugit ukiut sisamat tikillugit killilerneqarsinnaanersut sulisitsisumullu atorfimmullu aalajangersimasumut pituttorneqarsinnaanersut, aammalu ilaquttanik nassataqarsinnaaneq ataavartumillu najugaqarnissamut ingerlaqqinneq qanoq killilersorneqarsinnaanersut pillugit apeqquteqaat aallaavigalugu oqallinnissamik siunnersuut.

(Inatsisartunut ilaasortaq Pele Broberg, Naleraq)

Tunngavilersuut

Avataanit suliaartortitat piffissami killilimmi sulisussaapput, maani najugalinnik ilinniartitsinermut atorfinitsitsinermullu ataavartumik taarsiissutaasussaanaatik. Taamaattumik oqallisigineqartariaqarpoq avataanit sulisussarsiorneq qanoq atorneqassanersoq, suliffeqarfiit pisariaqartitaat maani najugalinnut suliffisaqartitsinissamik ilinniartitaanissamillu anguniakkanut oqimaaqatigiissillugit.

Maleruagassat atuuttut naapertorlugit kommunit avataanit suliaartortitamik atorfinitsitsinissamut akuersissuteqarsinnaapput atorfik maani sulisussamik imaluunniit Kalaallit Nunaannut immikkut attuumassuteqartumik inuttalerneqarsinnaanngippat. Akuersissutit sivilunerpaamik ukiuni marlunni tunniunneqarsinnaapput, najugaqarnissamut sulinissamullu akuersissutit atorfimmut sulisitsisumullu aalajangersimasumut pituttorsimasinnaallutik. Nunat Avannarliit innuttaasui akuersissuteqaratik najugaqarlutillu sulisinnaasut oqallinnermi matumani pineqanngillat.

Naleraq isumaqarpoq oqallisigineqartariaqartoq akuersissutit ukiuni marlunni tunniunneqarsinnaanersut ataasiaannarlunilu ukiuni marlunni sivitsorneqarsinnaanersut, katillugit ukiut sisamat kingorna pineqartoq Kalaallit Nunaannit aallartariaqarnersoq, aammalu akuersissut nutaaq aatsaat Kalaallit Nunaata avataani ukiuni marlunni najugaqareernermi pisinnaassanersoq. Oqallinnermi aamma eqqartorusuppagut suliffimmik allanngortitsisinnaaneq, ilaquttanik nassataqarsinnaaneq, ilaqutariittut ataatsimuulersitsineq kiisalu piffissami killilimmi najugaqarnerup ataavartumik najugaqarnissamut akuersissummumut qanoq sunniuteqarnissaa, Kalaallit Nunaannut atuuttunik nunat tamalaat pisussaaffii ataqqillugit.

Taamaattumik Naleraq apeqquteqaat aallaavigalugu oqallinnermi ammasumik oqallisigerusuppaa avataanit suliaartortitat qanoq piffissami killilimmi atorneqarsinnaanersut, maani najugalinnik sulisussarsionnissaq ilinniartitaanissarlu nukittorsarlugit. Oqallinneq inatsimmik aalajangersimasumik allannguissamik piumasaqaateqanngilaq.